

24/03/2002

Menonton Lagaan atau Cukai

BERMULA dari Moscow, saya terbang ke New Delhi untuk memberi ucapan tentang strategi Malaysia dalam era yang tidak menentu (uncertainty), atas jemputan Institute of Defence Studies and Analyses (IDSA) India, di India Habitat, New Delhi, Selasa lepas.

Seramai 24 orang dari 24 negara yang dianggap oleh IDSA (Institut Pengajian dan Analisis Pertahanan) sebagai cendekiawan atau pakar telah diundang dari Australia, Russia, China, Singapura, Thailand, Filipina, Turki dan Pakistan, antaranya berdepan dengan empat kali ganda cendekiawan India dari IDSA, Kementerian Pertahanan dan universiti India. Kami berbincang dan berdebat selama dua hari.

Ucapan penuh saya telah disiarkan dalam New Straits Times keluaran 20 Mac lepas, juga laporan seminar yang dirasmikan oleh Menteri Luar India, Jaswant Singh dan ditutup oleh George Fernandez, Menteri Pertahanan. Fernandez telah bergaul dan berbincang dengan kami pada majlis makan malam akhir persidangan dua hari itu.

Selepas berucap dan diminta membuat komen tentang hala politik dan ekonomi Asean - mengulas pandangan orang lain - saya dan wakil dari Russia, Australia, Filipina dan Ketua Pengarah IDSA, K Santhanam telah dijemput oleh TV India - Door-Darshan - yang mempunyai 14 saluran dan 14 bahasa. Satu talian yang diskusi isu semasanya paling popular di seluruh India dan Asia Selatan. Semasa di Delhi, saya telah berbincang mengenai perkembangan politik India semasa dengan mereka dari media, Kementerian Luar Negeri dan dua pemimpin Islam, satunya memegang jawatan dalam pemerintahan India, satu lagi di luar kerajaan. Mereka semua mahu tahu bagaimana kita berjaya memerintah dengan aman walaupun Malaysia dihuni masyarakat majmuk dan ekonominya berkembang tanpa menerima bantuan IMF (Dana Kewangan Antarabangsa) dan Bank Dunia.

Saya telah menerangkan kerana Datuk Seri Dr Mahathir Mohamad berkeras tidak mahu kita ditakluk oleh IMF dan Bank Dunia, kita berjaya! Mereka juga mahu tahu bila Dr Mahathir akan bersara! Saya jawab: Tiada tanda; dia lebih sihat, segar dan aktif daripada mereka yang separuh umur daripadanya. Saya kira Dr Mahathir akan mengakhiri nafasnya dalam jawatan. Saya konsisten tentang ini semenjak ucapan saya dalam Parlimen selepas pemilihan Presiden Umno 1987.

Ralat: Minggu lepas, nama Tan Sri Shamsuddin Abdul Kadir, pengasas dan tuan punya Sapura terbalik.